

儀鄭堂駢體文

四部備要

集部

上海中華書局據原刻本

校刊

桐鄉 陸費逵 總勘

杭縣 高時顯 輯校

杭縣 吳汝霖 校

杭縣 丁輔之 監造

版權所有 不許翻印

駢儷文目錄

儀鄭堂

闕里 孔廣森 拜軒

卷一

賦二首

頌一首

摺子三首

呈文一首

書三首

札四首

卷二

序十二首

記二首

卷三

書後三首

論一首

連珠九首

誄二首

哀辭一首

祭文五首

駢儷文卷一

儀鄭堂

四極四和賦

維乾隆三十有六年恭遇

崇慶慈宣康惠敦和裕壽純禧恭懿皇太后八旬萬壽慶典

皇上奉

安輿東巡符試多士于方岳之下遂

莅軫乎闕里衍聖公臣昭煥命臣廣森爲獻壽之詩

九章被諸中和韶樂以臚輿歡聲虔祝

上顧而嘉之有

詔卽以前試題試臣廣森臣廣森時已入京師應禮

部試未獲躬奉

恩德聞

命感激謹用

欽授四極四和題目擬作賦一篇竭盡髦髦之思庶

備太平之謳詠

臣聞天之大數在于十二循明霸以成歲望闕衡以

列次匠人象而通門虞氏法而畫地乃若河圖坎離

奠居亦有洛書衡柱承區斂素曜于鮮方振青英于

大塗火撓長麗之羽水流不若之虛蒼龍見而冲虎

赤馬馳而對鼠漢闕時其雙名周鼎著其履武咸旁

鉤乎四維以縱橫乎中五極者至也故分至爲時之

交極又中也故孟季爲仲之輔日集其辰四節和均

秋灰南呂夏管蕤賓天鼉朔聚月駟東陳是風雨之

所會實和義之所殷玉衡旋左金樞轉右北杓鄰陽

德之宮西柄合攝提之首貞大威則巨蟹移躔建高

叢則鬱車入宿赤道平而銀箭均宵黃極遠而金徒
變漏盛德王其鄉貴神壇其緒靈威既謝從以燁怒
汁光未迎先以招拒邠輦來寒陶莫往暑辨方正位
幹流錯行天元窮于析木人正起于登明薺甘芥苦
莖落芸榮金門律暖玉燭階平來風曰俊書雲必卿
於以順我時憲而光我化仰惟今
皇帝首出虹流篤生華渚在重光之歲陽值賈安之
紀序仲秋圍壯吉日庚午年符乎出震時應乎執矩
昔素王之降紱聞帝車之南指今青史之吹銅見招
搖之北底歲月日時卯酉午子式金匱于六陽正璿
璣于四履是以覽乎青陽開動數祥觀乎總章肇肅
頒常兆乎南郊長贏以昌禮乎北折富媼以臧則天
之運授地之方乘中建極負陰抱陽含五德而和會
躋九宇而壽康

赤嬰母賦

丙申之夏讀同年洪中書榜赤嬰母賦愛其詞致輒
復同作然正平賦是鳥寄其怨思僕既無所託附諸
倖色揣稱詠物之體云爾
若乃蒼華代謝朱陽在天桃茵舊落榴火新然赤闌
曲亞朱綴方連珊瑚鉤捲火齊屏懸筠籠乍啓有鳥
疑仙生西土兮質異稟南方兮色鮮戢紅襟之采采
舞紺趾之躑躑似緋衣之纖纖若朱組之翻翻渥赭
之姿非擬竊丹之號仍傳啄沈李而輕脣不辨銜落
櫻而細嘴相研然而棲之瓊宇貯以雕榜徘徊而繡
迴眺題璇脂深井綺燭虛筵方聆宛轉未訴纏絲
吐禽言而舌銳學蠻語而吭圓呼晨顧影聲夜驚眠

紅豆相思之怨枯桑遠道之篇亦有雀來鄩戶鳥集吳年驚魚雅于茄下雁翁雜于池前莫不頡頏共色毛羽同憐彼蜀道之素翎龍坻之黃翼尙未足以先焉

武成頌

臣聞九乾垂象金精耀參伐之旗八索臚占雷豫習行師之繇是以軒皇御籙先修赤水之征唐后垂裳必輯青邱之暴亦有周宣薄伐近在太原殷武哀師不踰荆楚而三年有賞易已象其成功千里來歸詩尙歌其永久方之今日靡得而言焉欽惟

皇帝陛下秉武三曾抗稜八表銀鑾拓地金虎開圖建木以西鑿空萬里長榆而北列燧千城象載形方規矩上黃麟之瑞銅街闢邸呼韓刑白馬之盟雲呂十旬記里之車合軌鞮胥九譯葦幣之史同文幽遐畢屆其梯航泰遠咸歸乎懷幃而禹功不到西流自絕于朝宗梟性難馴東徙仍迷于革響乃有兩金川者釐令游魂犬猺餘孽化殊天外犯焚塞以稽誅俗遠華中比夜郎而自大粵在卯辰之歲曾興戎己之師宵以投戈許其載木

恩寬費社未封武觀之鯨鯢榮假分符俾禦危山之魑魅而乃鏡心反噬鳴義矯虔不格兩階之干自投一面之網促浸土司索諾木負阻窺覲憑遐翻覆稀蛇薦食屢及于鄰疆蠻觸尋爭漸連于內地趨拉土司僧格桑蛋與駝比麗本疆生外順內違每泄駒支之語高巢陞制擅詢句町之仇議者猶以天險不可升鞭長莫能及轡野修戎之日亦緩前禽愈山合玉

之年非無後至文臣臆決請罷守于珠崖哲后沈幾命洗兵于玉壘蓋以王鈇威遠聯矢勝殘保大定功有征無戰三辰所照靡亭毒而或遺九伐無私孰孤離而必討於是發軍城郭簡銳微盧闕虎朝鋪人問沈黎之罪玷焉夜渡衆爭敵愾之功師出一年月聞三捷僧格桑棄地而遁小金川全境以降然而虎負嵎閒困猶思鬪鷹棲韝上飽即背人此則因壘之師所以勞其再駕渡瀘之役必將示以七擒者也

聖天子旻旻思賢綸書策將重鑿門之命寄專閫之司爰以阿桂爲定西將軍營平受律羌罕料其成禽裴相視師淮蔡聞而悸魄若乃隆衝第葦旗鼓堂堂朔鋒燕孤韓章鷁幟索倫蹶張之卒吉林超距之徒八旗試弁之倫六郡良家之子輶車百雉挾風隼以駢驅箬矢三鏃怯雲雕而墜影庚鈴制勝九天九地之兵甲帳懸符四正四奇之陣再平美諾一掃荒陬繫彼妻孥降其部落月氏已死漆函傳飲器之頭徵側爲俘驛騎致蠻銅之鼓唯是逆酋索諾木連難失勢知必及于

天誅鋌鹿已窮猶自恃其地利環山列柵背水施礮奮螳臂以當輪網蝥絲而結衛羊腸西轉自回九折之谿牛尾東來未鑿五丁之路雪凝陰坂經炎夏而不消日遠陽關積漏天而生瘴我師長馳渠答直冒槍雷指揮則屋瓦皆飛叱咤則九泥失險危城折箸械九設而九攻壯士乘墉布再懸而再斷文淵負羽獨進壺頭士載囊親踰劍閣遂以乾隆乙未八月

十五日破勒烏圍戈矛照月鶴鵠之隊彌雄旌旆生風鴨驚之聲盡亂斯時也

天子方講藝螭坊修文虎觀咨儒官于劉向遣謁者于陳農羽檄星馳疊下五申之令銅籤夜警仍披二酉之編豈非天亶聰明

聖兼文武者與刮耳崖者軍道之衿喉賊居之窟穴地稱巖邑山挺石林孝子望而旋車元侯行而束馬六師并力五尺略通道古攻其東南亞夫備其西北九重籌筆乃懸御于氏羌三帥宣猷更分功于郤范狼孤氣肅曠弩先飛箕壁星高火輜具舉進攻黃寺震響其秋神屢獲狹徒係繫其母妹我氣方銳破竹無頓刃之勞彼力益殫窾木有丁衝之急幕危燕散鼎沸魚驚方陳縛主之求始請吠堯之罪今年二月四日索諾木兄弟就禽治罔脅從誅無填服金城上奏七朝達于長安都護飛書五日聞其吉語葱靈執訊露版慶成比赤囊報至之時當

皇上展謁

兩陵奏膚

七廟靈臺上祭即陳丹水之功畢鄧升祠自兆素鱗

之慶善歸

聖母敬上

徽音奉

慈輦以豫遊遵翕河而哀對杏花萬葉兼省春耕蒔水芹宮式迎秋駕泰山玉策探瑞算之無疆魯殿金絲告武成之有截既而赤融效職朱陸移躔襄城迴

訪道之

輿已徵振凱旋之旅條侯之屯細柳環甲冑以來朝耿弁之在臨淄降乘輿而親勞然後有事

宗

社大獻馘俘秋官請纓夏卿執鉞戒彼費留之賞廣我通徹之封拒鬯青圭來召公于漢游葱珩赤芾拜方叔于新田李霍勛名咸開東第鄂襄毛髮並繪南宮雅奏勤歸軍容謹扣玉關偃革紫塞銷兵鶴膝羊頭仍入蘭鐙之庫龍文驥子散歸仙掌之山雖復金母環來樊侯鼎出冠軍絕幕刻石字于狼胥博望浮槎控河源于牛渚未若殊鄰稟朔荒裔占風寶布時供賧錢歲納再驍邛笮交輸流沫之珍奇傑侏侏偶疊聽提官之謳詠是則豐京王會列三臺于陰羽之中洛水明堂朝九采于應門之外不假銜鉤之后載十一征豈惟通譯之邊餘四萬里赫赫乎

於鑠

至人之聲靈煌煌乎來許之盛美綜茲經緯可咸五而登三勒之簡編將襲六而爲七者已臣廣森忝列鵬行粗窺豹管聞西戎之耆定均慶于並天念東土之瞻光感榮于私渥懷深睎尹語罄掄揚雖不工于文章尚慚朱鷺饒歌之作庶以載夫功德亦附白狼槃木之餘謹獻頌曰

總領戎旃師于甄部青叟從行白徒束伍有賤斯鷹
其矯如虎署道披圖指形聚黍裂彼右肩斷其脣輔
爾險何依爾遠何怙縫革衝礪邱龍飛炬破易撥燧
動若摧腐羌豪帥醜刮耳是聚井底困蛙穴中竄鼠
五兩振威重山夷阻季母既禽精夫亦虜戎庭分犁
苗人安撫紅旗之捷奏

行在所讓德于

天告功于

祖大武承謨達孝續緒吉蠲上

陵甘露有滑

瓊冊述微

璇宮秩祜

安輦輦輿洪爐清簾般賚協周祈沈觀滬水若恬流

登祗順扈輯瑞岱宗陳風嬌渚淑問西庠祭菜東魯

展菜崇今上儀稽古飲至策勛愷歌率舞青壇三陔

緹帷重組

嘉乃戰多慰我勞苦昔奏采薇今歌杜文相帷幄

武人樽俎榮以旂常申之褒黜形繪雲臺聲垂銅柱

天語龍轡雲章鳳舉紀迹峻崖勒崇膠序詞掩岐陽

典高岫嶂乃闢南端載升

展宇寮案師師徹行楚楚右列作士左班祈父鐸奏

靈鼗鯨鏗猛虞僑榮染鐸尸禹鼗鼓兩觀既誅

重巽式溥復稅農疇緩租國庾化洽橫舍仁流園圃

廣青衿員散赭衣侶威肅春霆澤沛夏雨九塞清塵

四民安堵唐平蜀道周省淮浦尚誦昌黎猶詩吉甫

以今準往瑣瑣何數

天錫

皇帝神聖文武於千萬年爲億兆主

爲宗子撰摺子三道

襲封衍聖公臣孔昭煥奏爲恭謝

天恩事乾隆四十五年正月二十八日蒙

遣吏部尚書協辦大學士臣嵇璜祭告先師孔子禮

成欽惟我

皇上緝熙睿履化育書林述

祖德而南巡道光下武順

天行而東顧心切右文咨簡從官祇承祀事吉圭奠

俎先人之饗鼎重新振玉和金舊宅之歌絲如在臣

奉呼門之澤絕叩陛之因向日心傾瞻雲路遠謹繕

摺遣族長臣孔尚智等齋赴

行在叩謝

天恩仰祈

睿鑒謹奏

具官臣某爲代謝

天恩事據世襲五經博士臣東野崇鑄呈稱乾隆四

十五年正月二十九日蒙

皇上遣吏部尚書協辦大學士嵇璜祭告元聖周公

禮成欽惟我

皇上懋學閱書繇基郊鼎六聯敘職成均協教胄之

經九夏和聲時邁第柔神之頌契勤施于陝右新議

祠官况啓宇于侯東舊紆

宸顧疇咨彙從展案枚宮仍雕之薦維虔肅廩之盛

有秩承休錄後軼建武之遺聞文憲虛崇陋祥符之

故事所有感激下忱理合呈請代奏等情到

天恩仰祈

審鑒謹奏

具官 某奏爲代謝

天恩事據世襲五經博士 仲耀涵奉祀生任世本

同呈稱乾隆四十五年四月十八日蒙

皇上遣太常寺卿吳玉綸詣先賢仲子任子祠拈香

欽惟我

皇上道景堯羹治符舜節靈臺偃武農山之赤羽全

銷璧水宏文長坂之素風益勵茲值

觀民蒞浙旋軫猶河式數仞之宮牆逮羣賢之祠宇

念仲氏禦侮吾道以爲重輕嘉楚產來遊學者莫之

先後特流

渙命並遣升香薦寶鼎以氛氲賁神叢而輝燭近

清塵三十里頻瞻俎豆之光遠闕里二千年尙食詩

書之報耀涵等均叨末裔共被榮施飲水有源戴山

知重所有感激蟻忱理合詞呈請代奏等情到

謹據呈繕摺代謝

天恩仰祈

審鑒謹奏

爲邑人呈請故知縣嚴君從祀名宦祠文

竊惟我

國家甄簡吏能澄釐祀族六廉考最優唱注于東銓

百郡營祠配循良于左坐所以生致其用沒報其功

布之秩官書之挈令故曲阜縣知縣陞任桃源同知

嚴君諱文典者清畏人知範爲士則導其賈牒寅輶
徵美俗之英敘其清資甲第上揆庭之藻下車讀法
條四戒于秦侯開戶恤孤酌一孟于任叟協風春鑑
輟駢避其敦葭靈雨秋繩履畝寬其納結宵流依火
競作譟管曉見天根卽成扛碇令行胥卒懸象緒以
銷頑名惕長官却牛黃而問直萊塵入甌史雲獨行
之賢叢蔭援街子產衆人之母由是賜杜詩之榮戟
特進勳銜望郭賀之襜帷就加容服渤海之夢繩待
理潁川之篠竹重迎旣增秩于丞卿仍牧吐于敝邑
及其借寇滿歲去魯有期邪谷一錢茨河兩馬簞壺
屬道耆幼攀轅東京銘酸棗之碑南部式甘棠之茂
是亦可謂所居民富所去民思者已昔朱卿舊德歸
祭桐鄉宋父遺靈分播汝社況以嚴君忠信之長慈
惠之師休問光于汗青茂績卓于綰墨某等不勝大
願願採輿誦之聲協街彈之議申祈

朝命許列鄉裡永房楨之潛馨飾局泉之賁渥庶使

雁門樂府不孤咏于疇年龜履神祠兼彰垂子後勸

上座主桐城姚大夫書

受業廣森再拜上言夫子大人座前去五月十七日

領到惠製儀鄭堂記一首如來鄭騎方窮寶玦之繩

恐效津龍遽化豐城之鐔雕陵顧字渙水騰文歡喜

奉持回還誦讀去天三尺未喻聲高繞極一句定知

塵起伏惟夫子大人立言不朽下筆爲經受書于河

洛之閒講學于濂伊之表斟裁體要二百年吏部之
文含吐風神六一翁廬陵之集乃若子山宮體丁廩
小文固有類于俳優尙取爲于執戟而廣森藉承談

末經示端倪以爲湘水波瀾稱言絕妙春旗楊柳無字可刪既舉斯隅自覽其切遂得粗知偶事強附駢聲它日韓陵片石免作驢鳴樊南一編積成懶祭誰開閒介即被雕朽耳矣蝸角荒廬蛇年草創東鄰紫映顧慚拙宦之居北市囂塵差遠小人之宅然而方纔布武廣不由旬在陸疑舟有窗似甕雖開府小園何嘗無賦而長卿陋室未必堪銘豈意金壺副墨石室餘縑錫以題辭光其案稅入長公別集彌榮三槐之堂乞退之一言便擬雙松之舍竊惟校漢儒林東京尙已稱鄉先達北海褒然是以小己忘涯高山仰止低徊哲範若見之牆撫擬賢容欲圖之壁重聞命焉曰姑舍是賢者識大不當囿以專家古之離經非徒尋夫章句許君謹案何據膏肓雜問之志六藝之論詎要道之微言祇通人之鄙事若廣森者私淑于趙商張逸之閒激揚于賈釋孫評之後旁要夕桀僅取多能觝字曲聲惟資小學上士勤行之道本未朝聞羣經淆亂之言何曾晚定若其溯高密之微風追不其之逸躅足使冀州畔援折敬伊人應劭宏通願爲弟子二千石青綬式駟馬以旌門百萬衆黃巾望單車而解甲世無孔子當亦游夏者流第之宋儒不在張程以下是則慕蘭相如之名其去猶遠讀臺孝威之傳此志終狂苟將業彼箋疏呻其佔畢而謂著書通德訓詁傳于此名寫定禮堂祝史尊其陳數匪直鄭公之學謬爲聖證詆諆抑幾董傳之徒乃有步舒感陋與因荷言提歸諸盍各負牆無地迫牖何年起安石于東山志今益遠望義和于南陸心與俱馳

謹啓

與裴編修 論篆第一書

三月十四日廣森白竊惟足下從學甚博向古甚殷輒以僕爲知書欲從僕而受篆猶恐好事有侯芭之客問字無揚雄之奇誤偶山筋謬談水骨不足以副厚期承下問昔者論語有訓餘力則以學文昌黎所言爲文宜略識字固非識其點畫學其偏傍而已必將探六義之根源審八體之因造蠱蟲在皿通于易爰閨王居門合彼官禮六身二首知絳縣之年兩縱三橫笑李彪之對蓋自雲陽御史上谷仙人始湮門左之傳浸起廷中之議席閒加帶鼓外安皮黃頭著于晉謠白水稱于漢識舉鐫羊下將軍所以興言長說馬頭祭酒爲之扼腕又況獻義姿媚虞褚流傳陳列車傍追改六殺之字頗諧義讀妄更九範之文者乎亦有京兆好奇山陰造字效形蝌蚪幻象鳥蟲仿款識于尸臣託盤銘于王子魏經石壁邯鄲見而自忘楚篆絲編僧虔發而強辨雖復居今稽古蓋亦離方遁圓筆少銳則以爲懸針墨微濃則又稱垂露是豈所謂曾元隸艸穀穀冰斯者矣從俗則沿譌日甚僞古則瑰異非經故學必以小篆爲宗義必以說文爲斷僕謂足下宜尋五百冊之部按九千餘之文別類離倫同條共貫參錯鉉之義疏以定其是否審顧陸之徵引以校其異同然後諧聲合三代之音解故軼九師之訓匪云小學足資博聞且今之說文則非汝南手跡今之小篆亦非上蔡舊章凡從及二寧取左垂言是口辛何須上曲至若本本別用醋酢倒施

賡即續之重文全乃今之或體既古今錯互篆楷乖違捨訓解奚以知非質確莫能曉況夫別風淮雨良刊本所易訛魚魯銀根詎茲編而獨免若不求指事會意之說強欲記刻符摹印之形將恐乏非反正虫乃屈中不悟三豕之非遂有十宗之陋爾不然說文既非千祿之書小篆又無記名之用何必封題蛻穎柿葉餘青坐對井闌魚鱗盡墨窮不可盡之功昧所以然之理僕且以爲不當爾也惟足下裁察

與裴編修論篆第二書

爲說者曰篆畫貴細篆體欲長引脚參停結構勻整是肖其形而未究其理悅于目而未得于心也夫隸有隱鋒楷有撥鐙字雖殊體理宜共科昔賢喻以金刀方諸玉筋蠅匾之法故爲垂頭鉞股之形亦取豐末或注墨外引或隨筆內投或蓄力倨句或赴勢波折一輕一重向背生焉若斷若續起止形焉是以蔡邕著說濃末微本皇象寫碑平上銳下譬晉楚之劍遞相詭反環燕之態自別纖縷而異曲同工殊輪合軌若云張而不弛環之無端雖古人所不能已抑古人所不爲已至有翦其纓穎稿以荻灰手不應心乃聽命于犀植臂非使指又假力于魚膠雖復平直方圓程圭准黍顧其楮毫烟墨振采失鮮尙足語舒雲結霧之工絕岸顏峯之妙哉今徒見繹碣之僞文執陽冰之槁簡以爲斯翁墨妙小生筆精豈知棗木重傳苗茨再刻跡已陳于芻狗神全失于畫龍空具匡當寧堪楷則其惟石鼓庶有遺型修短得中縱橫合度勁者山立柔者禾垂行若奔雲止若據槁若規三

雜若矩四方一字之內左右相生一簡之中稀疏適歷固當遠超二李近軼兩徐者矣方其握槩抽毫操觚染翰外必懸擊內斯正心杆軸裕于機先鉤繩溢于行表然後指搗在手裁制因衷亦猶禦寇彎弧試復查于杯水郵良執靶任罄控于鵝行篆之藝能於是乎在署蒼龍之闕象月覃思對白鵠之書兼辰不去古人於此亦云難也廣森頓首

上父執梁山舟侍講札

仰紆椽筆俯賜楹題遙蒙七字之褒愧荷百朋之錫廣森問奇有志驚駕十回執轡無因龍門萬丈輒用裝之玳瑁軸以琉璃馳賞墨林重齊紈之價懸輝壁壁知蜀素之珍謹謝

與同年林編修謝書札

承惠永樂大典護葉紙故府珍收前朝舊製比澄心于宋紙殊鏡面于吳箋杜武庫之蜜香初分帝賜張茂先之側理遂惠臣家染墨匪輕捧翰知重謹謝

答同年洪員外札

前件摘備貫珠漸輕升越但以皆頭寵秩列西火之官昆脚新資從大夫之後庶委垂助飾浣濯宏廉豈謂固辭忽堪踐禮永詩人之好是所愧于投瓊附君子之交終相期于贈紵

謝人代撰詩札

足下才高倚馬價重雕龍范岫之管一雙江淹之錦數尺僕略解蕪吟其如拙速自觀藻咏兼切欽遲輒復乞餘潤于懸河分末光于鑿壁孔璋多事亦代裁

書安國少文居然賦几所幸謬同瓊瑛竊向秀之縹緲猶恐易辨淄澠怵陸機之杼軸謹謝

駢儷文卷一

駢儷文卷二

儀鄭堂

戴氏遺書總序

東原先生姓戴氏諱震徽州休寧人也學于古訓言行可法以薦徵爲四庫全書纂修

賜官庶吉士春秋五十有五乾隆丁酉五月二十七日疾卒凡所著文章經義若干卷叔父農部公先生之昏因也綴而刻之廣森嘗聞先生緒論又感先生崇闡漢儒而不終其志以歿乃爲序曰

緬惟樂遊講藝訪太傅于石渠元日談經坐待中于重席時則五羊既遠金虎初開著學官者凡十四家說稽古者成數萬字至若五是大涉之徵定君陽武三科七缺之法弊獄淮南士苟通經皆能致用蓋原其授受本屬參商敘其世年未睽昌闕是以祖之前師沿之後葉北方戎馬不能屏視月之儒南國浮屠不能改經天之義夫學有優劣者時也經有顯晦者數也五君晚出非漢博士之傳千禩相仍廢鄭司農之注縱橫異說別創先天顛倒聖文悉更後定特以腐儒炫視易謬騷黃末士明經原求青紫但遵甲令粗知帖括之辭嚆克庚言紹彼先民之作敏而好學信而好古唯於戴君見之已君以梅姚售爲孔蔡謬悠妄云壁下之書猥有杭頭之字古文一卷祇出西州小序百篇舊名北斗正謨攝詰歷黃序而僅存月采豐刑違赤眉而已燼乃或誤援伊訓滋元年正月之疑強執周官推五服一朝之解譬之爭年鄭市本自兩非議瓜驪山良無一是是用翦除假託折衷羣淆步驟五三錄目四七爲尙書義考未成成堯典一

卷又以要聞五際尙論四家毛傳孤行是觴源于牟妙鄭箋破字每毫采于輟嬰莫不假聲注文以意逆志誠古訓之所式多識之所資也雖其篇冠以序擇焉不精或云托諸西河或云造諸東海然嗣矜貽玖何必欲色之音交扈羅鴛鴦爲陳古之刺爲毛鄭詩考正四卷別爲詩補傳未成周南召南二卷君之入書局也西京容史夙善徐生東觀中文遂分淹禮乃取忠甫識誤德明釋文殫求亥亥之差期復鴻都之舊互相參檢頗有整齊削康成長衍之條退喪服廁經之傳爲儀禮正誤一卷鄭斤粵縛之篇備遺事職穹蓋星弓之數首列巾車九經九緯營國有方五溝五涂奠水有則尋筵既度遂知洛邑之朝圭契未縣孰辨營邱之夕以至肆懸舞甬五等琮璜槐里櫛空椎成劍沒大夫嫁女之器未必皆真單于賄漢之銘何嘗盡爲謠鑑之所畫續梁肅之所更釐不有參稽將無競爽爲考工記圖二卷古者冕服以祭弁服以朝祭則衣純朝則衣布帅形連帶制異于直方屨色從裳次分于續繡周壇饗帝大裘降繁露之華魯稀嫌王旒璆飾丹雘之祝等威昭焉文質備焉道學起而儒林衰性理興而曲臺絕齊素委武莫識稱名殷夏圖章焉能考据溯增冰于積水示祭海于先河爲學禮篇一卷冠其文集十卷之首且夫一陰一陽之爲道見仁見智之爲性通于六籍之爲學辨于萬事之爲理謂理具靈臺則師智者得謂學遺象罔則悟寂者先豈有略窺語錄便謂知天解斥陽明即稱希聖信洛黨之盡善疑孟氏之未醇其說空空其見

小小蓋釋鄭君生質之訓誦周雅教木之箋所謂受
中自天秉彝攸好孔提可按漢學非譌爲原善一卷
孟子字義疏證三卷大學中庸補注各一卷君之學
術此其大端歟景純有云爾雅者九流之津涉六藝
之鈐鍵虎闌小學未束髮而知書豹鼠奇編不下席
而觀古故辨言之樂對于三朝首基之文問于五始
至于殊方別語絕代離詞皆轉注之指歸亦凡將之
墜緒爲爾雅文字考十卷方言考證十三卷書教有
六最夥諧聲叔重無雙唯傳解字若乃部分平仄母
別見溪官家恨狹羊戎之所自爲天子聖哲梁武之
所不信古人韻緩止屬惟輪後世音繁實精引墨君
審其清濁導以源流旁通反紐發顯約之舊聞上協
詩騷採顧江之新義爲聲韻考四卷聲類表十卷
論八集尚有轉韻二種遺稿未見生先
百氏研音之下雅愛三閭以爲城臺訪女近窈窕之
遺聲湘水寒芳續榛苓之逸響叔師注而未詳辨招
附而不可核之漢志名從主人爲屈原賦注四卷自
疇人分散鄒大失居九章中落昧商高積矩之言八
線西來竊保氏旁要之算而耳聽下士穴見小儒不
知五五之開方輒薄九九之賤技哨壺斗五律管徑
三元晦以之存疑季通以之強說未知紀步何能讀
宅柳之經未曉倨句何能治上輿之記爲九章補圖
一卷原象一卷古曆考二卷曆問二卷昔趙商難禮
先求五服之方景伯受詩卽涉七州之地君山川能
說郡縣成圖鄺元故籍證其縣視崑渤今流條其絡
脈爲戴氏水經注四十卷水地記一卷直隸河渠書

六十四卷嗚呼君之著書可謂博矣君之見道可謂
深矣向使壽之以年行其所志下安輪于都尉授梯
几于鴻臚雍宮未建命曹襄以定儀大予將成詔宋
登而持節雖復辨卿訟闕公羊未必能明子駿移書
逸禮難其置立而太山郡將北面稱師上蔡通侯西
行受業則何湯既貴輜車方賜于五更君上從遊錄
牒庶多于萬計豈謂陰堂告稷圓石鐫名一經之寫
定無年三歲之瓊瑰已夢清明卷佚長封下馬之陵
通德人亡不待嗟蛇之歲然而太玄履謁終遇桓譚
都養陳謨彌尊伏勝鄭鄉絕學倘千百載而重興戴
氏遺書於十三經其有補悲懷逝者延佇將來

王氏醫治序

語曰若金在鎔惟冶者之所鑄貢云三品見情之列
居前國有六工築氏之齊執下所以激沈清濁甄類
苦良蓋吏之有課史之有評詩之有品書之有斷方
諸大冶厥義惟鈞則我更生王君於是醫治之作
言夫鵠居既遠鯢壽斯希四節潛垂于冥造之初六
鑿相攘于徹昀之後雖復桃弧春射天札猶多荆盾
秋毆軌嚏詎少由是權輿百草赭鞭奉軒后之威消
息三停素女發明堂之訣入靈蘭之室卽受奇骸過
長桑之舍方聞禁要冰臺三歲銳刺九名乞錄籍于
開陽駐顏暉于連石是以刑臣西上降綸玉而求方
世子南征解基瑜而採藥然而青囊委蛻卷軼丙丁
元晏淪湮經虛甲乙自餘楚賦鮮稱九折之良不遇
涪翁孰曉六微之技昔之視垣一方見心六孔長兄
察色仲子規囊裏紺知生茲青知劇龍門濁浸回通

關蟄之經餘穴澄源內合支蘭之藏豈有循難轉急
握虎翻舒狀榆落而非真期非英而罔驗帷中十指
曾迷婦寺之殊壺子三淵不辨權衡之氣斯診脈者
失也遙傳帝問僅九雀于茅蒐閒採軍謠拯河魚于
麥鞠黃環赤箭未錄桐君漆葉青麝略存樊氏而或

倍偏枯之餌倖瞑眩之瘳壹媿母以爲君謂鳥頭而
可帝必致以熱益熱以寒增寒心識分銖非其能事
治蠲湯液去之愈遠斯處劑者失也將謂上商少羽
會于六六之紀欽徵加官判于五五之性則七元詭
歷孰司天其可憑八谿蘊深譬迎雲而未極相如瘡
病非皆黷作之時杵臼痠疴何必容平之月玉機旦
讀祗亦空文金匱年荒已爲陳迹循環素石溜仍
疎俯仰鉛黃膠飴莫效斯泥古者失也晚有完素嗣
以義烏損陽益陰墜離升坎廢溫中之味先寫下之
法五分之尉奚施百濯之寒垂殆嗟乎春燠者生之
徒秋凄者殺之令故楊泉有言道家尙冷醫家尙溫
今輒反之使升明火化絕于君主之官酒漸陰淫客
于奇恆之府懸方肘後安望延齡納斧胸中將無伐
性斯見偏者失也王君仁者愛人學焉先覺自垂絳
馨厭窺中古之書早悟華琳似飲上池之水若乃萬
金良藥九部奇經審咬咀于毫釐候樞闔于尺寸經
過濟北便識才人留滯交南倘逢仙令廣峨嵋之術
祕欲託嬰巢拾長沙之仆漏宣明孫絡微其治案已
驚掛虺之車推其神工應寤援熊之夢且復濡煙橘
井比事芝函岐區復逆之詞和緩春秋之策意勇信
史之傳俞矯寓言之篇以及歲稽四失周官之所殿

月爲千軸梁皇之所噴靡弗收羅於此法戒品題備
適流別洞該者矣猶恐末士膚受攻乎異端襲高陽
之紕紛昧河間之結滯死如可作疑懷躍冶之鳴生
不同時尙有載金之悔是則辯園何窮狂泉不竭存
其正論質諸古人

先外舅詩集序

外舅芭孫先生姓沈氏名世燕浙江仁和人祖諱
元滄仕文昌縣知縣本姓徐氏以寧魏之親引芭鄧
之義遂自懸榻之裔爲後繼簾之宗考諱心養素家
園削青藝苑有孝友烝烝之行鄉黨恂恂之聲焉故
按察使廷芳公則先生之叔父也先生青雲稟器皎
月裁襟驟篠之餘能談顧免讓梨之下卽辨家禽及
左類觀旂東綵鼓篋是惟司馬探稽之歲士衡述藻
之年旣而西旅底平

南巡祥習太清賦上記延恩之匭函刻漏銘成旌佐
公之束帛特以龍門箭緩鷄路風危季子之裘幾窮
于敝縷公孫之策屢下于有司尋遣挺解之憂頗類
思貞之疾壯心已挫負四射于蓬弧利器仍存淬一
劃于鉛刃遂以縣丞試用河南省久之借補武陟縣
典史心存濟物守慎持廉佩犢宣風令長資其翊贊
破難讞訟豪黠畏其神明然而斗米折腰抱關託跡
充階逸駿悲鳴伏阜之前鬱澗長松永履莖苗之下
綰黃綸于賤吏每益牢愁倦青骨于風塵不堪煩劇
南昌梅尉空蟬蛻以儀仙六安桓丞竟鴻漸而鍛羽
春秋四十以乾隆戊子六月三日卒官嗟乎與善無
徵餘殃有再男昏女嫁公明不見于生前玉隕蘭凋

通子又亡于身後向期多感知棟宇之蕭條王粲不逢孰琴書之付託所遭若此可勝愴哉先生少遊齊魯晚踐嵩邱授簡抽思是細侯之八詠登高作賦有大夫之九能固已馳驟杜李斧藻陰何清詞溢乎縹緲瑰句盈乎卷軸山梁但謝著作飄零今之所存百不逮一廣森弱齡一見謬託附于蘿絲異地十年遂長睽于松嶠每開遺帙泫然生哀欲觀全編邈然莫自發閨中之藏篋訪日下之舊游僅得詩若干首張卿並世或譏白鳳之書左賦他年將貴青童之紙恐就湮沒綴而集之集錄如左

張舍人 熱河集序

昔嚴夫子有言經有五涉其四州有九游其八猶以聽覽所及不踰白阜之封吟翰所被未罄黃坤之域亦有落梅驄馬迢遙隴上之章低草牛羊牧勒軍中之句鏡歌白鼻樂府黃塵過青冢而怨琵琶弭白檀而思擊鼓莫不叩響風疎聯辭雲委然而悲筵九月塞草前衰橫笛三臺關柳易折羈寄之情長感慨之興短噍殺之音多藻績之詞少也瘦銅舍人負沈宋之才游常楊之職紫荷奉臺紅藥當階曉趨丹屏夕拜青瑣直鸞闈而端牘對雞樹而流唱固嘗倚馬七紙握蛇百篇人誦穆如之風世傳蔚爾之文矣熱河者神明界局地貳陪京里其道路既遠百郡之外奠其邑居仍當五都之勝

國家陋甘泉于漢氏侈仁壽于隋年以爲堯皇遊豫必作宮于成陽周王考卜亦朝步于豐水每中郢履節清明告風乃睠北顧此焉清暑時則舍人滿歲灌

謁往觀爰閱考日首塗兼辰戒道房雲在空箕風動衣天日姓晏宙宇熒朗仰矚

宸居之麗俯察區陬之廓得不掄揚舞咏舐和烟墨者乎若乃層巘隱天長波帶地黃靈訪道之山翠嬌沈王之渚舍人極覽津委旁綜載牒徵鮑邱之湮流問濡水之故瀆博望之槎萬里探析崑源太冲之賦三都參稽方志是則縹囊一詠卽注桑欽之經墨林五言可備闕駟之記且夫掄雲之籀半柯自奇衝霜之松寸莖斯見讀是編者其可以知舍人之詩也已

閨秀王薇玉玉珍集序

昔靜女之三章取彤管焉被壽人于笙磬非無都荔之詞列縵宿于羲娥不廢葦杭之怨葛山少婦執越布以歌勞柘館貞嬪裂齊紉而數逝書之硯北盡金屋之奇才選入江東卽玉臺之新詠女子善懷香奩尙已則有通華望淑慎閨儀南國新人東家舊姓十三纖素二七裁衣漱潤蕤于瓜年剡芳名于苕玉長言婉婉女師德象之篇好句流連吉甫清風之誦前身蓮葉不踐陳泥他日椒花必多新製況復鴛鴦左顧孔雀南飛歸小婦之高堂調絃錦瑟識上頭之夫婿絡繹青絲鑪熏夕而共香鏡照晨而同影司空博物本兒女之多情內史工書作夫人之弟子斯又王郎天壤愧此多能居士桑榆羨其嘉耦者也若夫紅羅帳掩朱鳥窗開初成墮馬之粧自服游龍之彩繡餘菡萏倦卽停鍼製就茱萸織常當戶莫不語綠情靡感與候遷牙管一雙金缸二等雪凝謝苑擬飛絮于風前日出秦樓歌條桑于陌上至如雙聲讀曲

十索名題陽羨新茶紬書鬪罷南安早栗故事疏來
香沈水而郎歌繭懸絲而妾和西陵松柏便結同心
北地焉支彌增警蹕香囊叩叩是繁採之定情雜佩
珊珊有鄭姬之警夜奚止爲歡玉女爭投百箭之驍
射雉珠皋始見三年之笑又如草生南浦梅下西洲
贈子將離呼卿小別萊藍盈匊指五日以爲期蕭艾
懷人比三秋而更遠遺簪紹續破鏡連環書檢六張
文周四角蘭成集上曾裁寄婦之書徐淑詩中不少
望夫之什亦或少君歸里對挽鹿車侯光去吳仍偕
鴻婦漢水之平塗七百江陵之遠道千三春嶂青螺
來發雙蛾之色秋波白鷺迴成九曲之珠是則七邑
東征曹家善賦百泉舟楫衛女寫憂抑亦詩發乎情
情生于文者與然而蓉生江上杏倚雲邊未免牢愁
誰能理遣重以諸姬適邨永歎肥泉季姊歸鄣先零
弱歲芝焚易感蕙質何堪幾日飛龍抵愁藥店數聲
別鵲忽上琴絲簾塵則榻冷琉璃吟筆則牀空翡翠
左思嬌女能無失母之悲班固佳甥應有問神之作
於是子荆改服文度多傷求故劍于箱簾綴遺翰于
鏡檻紅桃麗字遂書河北之箋白蠟妍辭徧識閨中
之媛而或者謂結璘有藥弄玉疑仙三髻雲鬟蓬壺
已隔層波羅轡洛浦仍逢倘作異聞傳諸好事則綢
繆贈答將皆戴勝之瑤觴宛轉聲音盡入彩鸞之唐
韻玉小傳云亡後託仙致寄外凡絕自言
尸解仙去居切利東宮掌上界書三百架

岐陽宮詞序

蓋麗以則者詞人之賦也安以樂者治世之音也操
暢遷移比興墜缺江南七弄豔體漸多河滿一聲宮

詞斯尙故若芙蓉掌上記其所聞花萼宮中書其所
見源流數代涇渭諸家競秋士之妍聲接冬郎之繁
韻或稽載以歌其事或憑虛以致其情近自羸劉皆
有題目已上及夕陽齋館朝走岐原妹自天來姑爲
姬耦銀環進退盈內御于九官琮屢將迎重京嬪于
三樓顧茲陰教獨少陽春言其盛也則有征星敘御
滿月專房綠黃靜其裳衣莞簟和其上下春稊候燕
壇前禮帶輶之妃冬聘占熊戶左侍持銅之史繼三
盆手降貝組而親蠶詔六宮人肅珈衡而獻種於其
衰也遂有穆天子之荒哀淑人之寵閨妻梟哲越女
蟲飛哭漢水之膠船雙沈鵲扇笑驪山之烽火一敗
龍燄然復曉脫瑤簪永巷悟庭燎之后晏鳴玉佩應
門本祗席之詩似此微音未遙姜媚如傳雅詠便繼
周南何必綠篋赫颺刺椒塗之燕尾絳紗繫臂摹竹
戶之羊車北朝則續命琵琶小憐粉鏡南帝則衣塵
皂莢并辱臙脂方靡濫于鉛華足流連于絳墨者哉
雖或世隔千齡時更九古素成冊爛赤管篇湮而月
紀循環尙見周官之注文家姪姊略存何據之言三
翟素沙非無服志九龍重璧亦有宮名猶殊夏上三
嬪止荒唐于山海虞釐二女久寂寞于瀟湘是以思
西方之美人徵北宮之故事體裁絕句得首若干倘
有韋母門人粗通內宰鄭公婢子厭讀中泥謬尋架
屋之文輒擬由房之曲將謂少君帳裏衝璫如聞不
準書中壺軸在望矣

壬辰九月陶然亭宴集序

歲旅執徐日曜天蝎辛卯同年進士會于城西之陶